



NYIRI NYANGATJA TJUKURPA PULITJUMUNUTJARA

**NGURA NYANGA SOUTH AUSTRALIALA PULITJUMUNU UWANKARANGKU KALKURĀ WANGKANGU ANĀNGU
NGURA WINKITJA WIRURĀ AṬUNYMARA KANYINTJIKITJANGKU PULITJUMUNU TJUṬA KUḶUKUḶU**

PULITJUMUNUNGKU ALPAMILANTJAKU MUKURINGKUNYTJA:

Uwa, nyuntu tjinguru pulitjumunungka alpamilantjaku tjapini ka nganana nyuntumpa tjukurpa kulira mulamulangku kulilku nyuntumpa kuraringkunyitja wiyangku

- Munula nyuntunya wirura purkarangku wangkaku pauntjingara wangkanyitja wiyangku
- Nganana pukultu wangkaku mirpantjungku wangkanyitja wiyangku
- Munula ara nyuntumpa kulintjatjanungku tjukurpa tjukururu kutju nyuntunya wangkaku ngunti-ngunti wangkanyitja wiyangku panya nganana nyuntunya mulamulangku alpamilantjikitja mukuringanyi

Uwa, munu nyuntu alpamilantjaku tjapinnyangka nganana nyuntunya pulitjumunuku tjukurwanungku alpamilalku mulamulangku:

- Nganana tjukurpa nyuntumpa kulira nyuntunya tjakultjungkuku yaaltjingara alpamilantjikitjangku pulitjumunuku tjukurwanungku
- Nganana phone nampa nyuntunya ungkuku nganana ngula ringamilantjaku munula nampa kutjupa kulu nyuntunya ungkuku, panya ngula nganana ringamilarampa nampa palunya wangkanyitjaku, kala nampa palunya kulira ara panya nyuntumpa kulilku
- Kutjupa-ara nyuntumpa tjukurpa kulira nganana tjinguru kulilku, "Wiya nyangatja pulitjumunuku waaka wiya, nganampa wiya Nyangatja anangu kutjupaku wara." Alatji kulirampala nyuntunya nintilku anangu kutjupakutu ankula tjapintjaku, paluru tjana nyuntunya alpamilantjaku
- Palu tjinguru tjukurpa nyuntumpa kulira nganana alpamilantjikitjangku kulilku munula palulanguru nyuntunya wangkaku nyaaringkuku kuwaringuru
- Munula nyuntunya tjukururungku wangkaku nganana pulitjumunungku nyaa palyalku, munula nyaa puṭu palyalku. Munula yaalara palyantjikitjangku kulu wangkaku
- Uwa, nganana ngunti wangkanyitja wiyangku tjukururungku kutju nyuntunya wangkaku

Uwa, nganana ngunti wangkanyitja wiyangku tjukururungku kutju nyuntunya wangkaku:

- Nganana nyuntumpa tjukurpa kulilku munula tjinguru tjukurpa kutjupa tjuṭa kulu ngurira kulilku ara panya palunya tjara panya nyuntu wangkanyitja-tjara. Tjingurula anangu kutjupa tjuṭangka kulu tjapira kulilku
- Munu nyara palulanguru uwankara kulintjatjanungku nganana tjinguru palyanmankuku alpamilantjikitjangku munta tjingurula kulira wangkaku, "Wiya, nyangatja pulitjumunuku wara wiya Kuwarila wantinyi ka kutjupangku nyuntunya alpamilalku"

Palu nyuntunya alpamilantjikitjangku wangkarampa nganana nyuntumpa phone nampa walkatjungkuku mununku ngura ini kulu. Munula tjinguru nyuntu wangkanyangka kutjupa kutjupa palyalku munula palyantjatjanungku nyuntunya tjakultjungkuku nyuntu kulira ninti nyinanyitjaku. Munula palu purunypatu rawangkuṭu nyuntunya tjakultjunama nganana nyuntumpa aranguru palyantjatjanungku

- Tjingurula nyuntula tjapilku alatji, "Yaalarala nyuntunya ringamilara tjakultjungkuku?" Munta tjingurula nyuntumpa ngurangka wirkara wangkaku, palya? Yaalara nyuntu ngurangka nyinanyi." Alatjila tjapilku ngula nyuntula tjakultjungkunyitjikitjangku

PALU KUTJUPA-ARA NGANANA TJINGURU NYUNTUNYA LAW KAṬANTANKUNYANGKA NYANGANYI. MUNTA TJINGURU ANĀNGU KUTJUPANGKU NYUNTU KAṬANTANKUNYANGKA NYAKULA NGANANANYA TJAKULTJUNANYI, KALA PALULANGURU MA-WIRKARA NYUNTUNYA WANGKANYI MUNUNTA TJINGURU WITINI. KA ARA NYANGA PALU PURUNYPA NGARANYANGKA NGANANA TJUKURURUNGKU PALYALKU, PANYA NGANAMPA TJUKURPA NGARANYI PPULITJUMUNUKU NGANANA NGUNTI-NGUNTI PALYANTJAKU-TAWARA:

Nganana tjinguru nyuntunya nyanganyi anangu miri kutjupa, tjinguru wangka kutjupa, palu pala palulanguru nganana nyuntunya wangkara kurantja wiyangku wantiku:

- Nganana nyuntunya purkarangku wangkara tjapilku munula nyuntunya miringuru, wangkanguru, mantaranguru kulu ngunti kurantja wiyangku wantiku
- Nganana tjukururungku palyalku nganampa law kaṭantankunyitja wiyangku

Munu nganana nyuntunya tjukururungku wangkaku nyuntu nyaaringkunyitjaku

- Panya law palya ngaranyi anangu uwankaraku ngura winkinga nyuntu nganana ngapartji-ngapartjingu aṭunymara kanyintjaku. Ka pala palulanguru nganana pulitjumunungku nyuntunya tjukururungku palyalku law-wanungku kutjupangku nyuntunya ngunti kurantjaku-tawara
- Munula nyuntunya tjukururungku wangkaku nyuntu uti kulintjaku kuwari nyaaringanyi
- Munula nyuntunya nyiri kutjupa kutjupa nintilku panya kapamantangku alatji nintintjaku wituwitugu, ka panya nyuntu nyiri palunya nyakula kulilku, "Munta-uwa, nyangatjaya tjukururungku palyani."
- Ka nyuntu nganana tjapinnyangkala tjukururungku wangkaku ngunti wangkanyitja wiyangku. Tjingurula wangkaku, "Nyanga alatji kuwari ngaranyi." Munta tjingurula wangkaku, "Wiya, palya, ngulala nyuntunya wangkaku tjukurpa mulapa kulintjatjanungku"

